



## VENDIM

Nr. 852, datë 26.12.2024

### PËR

#### PROCEDURËN E PARAQITJES SË KËRKESËS, AFATET KOHORE, PËRGJEGJËSITË DHE ROLET E PËRDORUESVE TË SISTEMIT PËR PËRFITIMIN NGA PROGRAMET E STREHIMIT SOCIAL

Në mbështetje të nenit 100 të Kushtetutës dhe të pikës 1, të nenit 14, të ligjit nr.22/2018, "Për strehimin social", të ndryshuar, me propozimin e ministrit të Ekonomisë, Kulturës dhe Inovacionit, Këshilli i Ministrave

### VENDOSI:


1. Ky vendim ka si objekt përcaktimin e procedurës së kërkesës, afateve kohore, përgjegjësive dhe roleve të përdoruesve të sistemit përfitimin nga programet e strehimit social.
2. Aplikimi përfitimin e programit të strehimit social kryhet *on-line* në portalin unik qeveritar "*e-Albania*".
3. Procesi përfitimin nga programi i strehimit social kryhet sipas procedurës, si më poshtë vijon:
  - a) Pas aplikimit në shërbimin elektronik në portalin unik qeveritar "*e-Albania*", struktura përgjegjëse e strehimit në njësinë e vetëqeverisjes vendore shqyrton aplikimin brenda 7 (shtatë) ditëve nga data e aplikimit në portal;
  - b) Në rast se struktura përgjegjëse konstaton të meta, njofton aplikuesin nëpërmjet portalit unik qeveritar "*e-Albania*", në seksionin "Dokumentet e mia/mesazhet e mia" të korrigojë pasaktësitë, brenda afatit 5-ditor;
  - c) Kur aplikuesi nuk korrigjon të metat, brenda afatit të caktuar, aplikimi refuzohet dhe njoftohet nëpërmjet portalit unik qeveritar "*e-Albania*" në seksionin "Dokumentet e mia/mesazhet e mia";

- c) Kur aplikuesi plotëson kriteret, struktura përgjegjëse për strehimin bën shqyrtimin dhe vlerësimin dhe e dërgon për miratim te drejtuesi i strukturës për strehim;
  - d) Pas miratimit nga drejtuesi i strukturës përgjegjëse për strehimin, aplikuesit njoftohen nëpërmjet portalit unik qeveritar “*e-Albania*” në seksionin “Dokumentet e mia”, brenda 10 (dhjetë) ditëve nga data e miratimit të listës nga këshilli i njësisë së vetëqeverisjes vendore.
4. Aplikuesi ngarkon vetëm dokumentacionin që sigurohet nga entitetë të tjera private, të cilat nuk sigurohen nga nëpunësit e administratës. Pagesa për tarifat e nevojshme për procesin e aplikimit për personat me aftësi të kufizuar apo dhe familjeve pa të ardhura sigurohen nga njësia e vetëqeverisjes vendore, sipas pikës 4, të nenit 14, të ligjit nr.22/2018, “Për strehimin social”, të ndryshuar.
5. Struktura përgjegjëse për strehimin në njësinë e vetëqeverisjes vendore njofton nëpërmjet portalit unik qeveritar “*e-Albania*” aplikuesit jofitues, duke arsyetuar vendimmarrjen, të drejtën e ankimit dhe afatet kohore për ushtrimin e kësaj të drejte. Vendimi gjenerohet me vulë elektronike të institucionit ose me nënshkrim elektronik dhe postohet në seksionin “Dokumentet e mia” në portalin unik qeveritar “*e-Albania*”.
6. Rolet e përdoruesve të sistemit të strehimit social janë, si më poshtë vijon:
- a) Çdo njësi e vetëqeverisjes vendore konfiguron sistemin e banesave sociale, sipas organigramës së vet nëpërmjet rolit të administratorit. *User-i* i administratorit ka rolin e hapjes së përdoruesve në sistem;
  - b) Punonjësi i ngarkuar me rolin e vlerësuesit bën vlerësim dhe shqyrtim të dokumentacionit të ngarkuar nga aplikuesi dhe e përcjell atë për miratim te roli i përgjegjësit;
  - c) Përgjegjësi bën vlerësim të aplikimit të shqyrtaur nga vlerësuesi dhe e dërgon për miratim te roli i kryetarit të Këshillit Bashkiak;
  - c) Kryetari i Këshillit Bashkiak vlerëson aplikimin e ardhur nga përgjegjësi dhe e dërgon për miratim në Këshillin Bashkiak;
  - d) Punonjësit e ministrisë përgjegjëse për strehimin kanë rolin e audituesit, si dhe tagrin e nxjerjes së raporteve në nivel kombëtar për numrin e aplikuesve, numrin e përfituesve, numrin e familjeve në listë pritje apo të filtruara, sipas kategorive përfituese dhe bashkive;
  - dh) Arkivuesit në njësinë e vetëqeverisjes vendore janë përgjegjës për vendosjen në dispozicion të informacionit për të dhënat e aplikuesit, datën e regjistrimit të aplikimit, dokumentacionin shoqërues;

e) Importuesi është një rol me të drejta të veçanta, i cili mund të shtojë aplikime në sistem, që gjenden në regjistrin e familjeve të pastreha, përparrë krijimit të sistemit të strehimit.

7. Ngarkohen Ministria e Ekonomisë, Kulturës dhe Inovacionit dhe njësitë e vetëqeverisjes vendore për zbatimin e këtij vendimi.

Ky vendim hyn në fuqi pas botimit në “Fletoren zyrtare”.



NR.PROT. 4083/1  
DATË 27.12.2024

MINISTRISË SË EKONOMISË, KULTURËS DHE  
INOVACIONIT  
TË GJITHA BASHKIVE  
QENDRËS SË BOTIMEVE ZYRTARE

Sekretari i Përgjithshëm

